



# VERSCHNUUFFER GNEPF

Zeedel Verschnuuffer Gnepf 2024

## BARBIE LIFE IN THE DREAM CITY (Basel)

Willkomme z'Basel an mim Rhyy  
S isch Fasnacht – scheen, bisch au derby!  
Bisch ganz wyt graist, hesch's welle see  
Egal eb Rääge oder Schnee  
Wie Basel gmainsam yystoh rief  
und kollektiv sich ganz verdieft  
In däne allerscheenschte Dääg  
Do goht die Stadt ihr aige Wääg  
«Dream City!» dänggt sich mäenge Gascht  
Us Noorde, Süüde und Färnoscht  
Bim Stuune isch gar Nyyd drbyy  
Ach kennt's doch nur bi uns so syy  
wie z'Basel wenn's denn Vieri schloot  
sy hänn sogar e Bundesroot!  
Die Stadt, e Draum, fascht surreal  
Fyr's Barbie Life basst's ideal  
Und au dr Frynd isch wunderscheen  
Mit Wäschbrättbuuch – oh yes we Ken!  
Mit Bling-Bling ziehn' mir duur die Stadt  
In Rosa und mir finde's glatt.  
Isch Dir dä Barbie-Hype e Gruus?  
Denn gang ins Oppenheimer-Huus  
Mir leehn ys d'Stimmig nid versuure  
Hänn Fraid an Pfyffer und Dambuure  
Und im Drei Ke(e)n-ig git's e Fesch  
Fyr mängi Läbere e Tescht  
Woby mir Barbie-Gnepf denn nur  
E Wasser näme fyr d'Figur

Inmitte vo däm Fasnachts-Truubel  
Do stuunt dr glai Tim in dämm Struudel  
Us Muusig, Liechter, Menschemänge  
Ass är sich grad an Kopf muess länge  
«Dä Bsuech do z'Basel isch dr Hit  
Bi mir dehai, do git's das nid!»  
Nodäm är zrugg in Alltag keehrt  
Do goht's nid lang, bis dä ihn steert  
Sodass är noo dr Schuel ratzfatz  
In Zug yystigt mit Fänschterblatt  
Zem die «Dream City» noomool z'seh  
Vom «Barbie Life» will är no meh  
Die Reis, die nutzt är, sich z besinne:  
Konfetti saage ligt nid dinne  
Au s'Maske-Wort settsch unterloo  
Wenn d'Basler Fasnacht mecht'sch verstoo

Gross isch sy Stuune wo-n-är denne  
Nid s'Basel seht wo-n-är duet kenne  
Zem Bahnhof uss, erstarrt dä Gascht  
E Drämmli yyberfahrt ihn fascht  
«Das seht jo glyych uus wie Dehai!»  
Uff's Mool fiehlt är sich ganz elai  
Zem Glygg kunnt e Verschnuuffer Gnopf  
Und seht dr Tim, dä armi Dropf  
Uff d Froog, was ihn denn so bedruggt  
Do rief dr Tim, scho fascht verruggt:  
«Heersch d'Autofahrer hässig huupe?  
Seh'sch wie sich alli Lyt mien spuute?  
Wie alli uff ihr iPhone glotze  
Und in dr Kasseschlange motze!  
S'scheen Barbie Life, was isch druus worde?  
D' Dream City – isch dr Draum äggscht gstorbe?»  
Dr Gnopf sait ihm: «S'isch laider wohr  
Es isch normal und zwor's ganz Johr  
Gemaini Mensche, Huusuufgoobe  
All das duet ys au z'Basel blooge»  
Do isch dr Tim ganz schwär enddyscht  
Und ballt die beide Händ ze Fyscht  
«S Barbie-Life, s' Fasnachts-Brogramm  
Isch kurzäblig wie Inschtagramm!  
d'Dream City isch nur temporär  
Dr Räscht isch Basel, regulär!  
Mit schlächtem Fuessball, Alltagsorge  
Und Weggerlydde jede Moorge!»  
Dä arm glai Tim beruehigt sich nymm  
Mit nyyn e Midlifecrisis – schlimm!  
Doch unsre Gnopf bringt zrugg sy Lache:  
«Genau wäge däm muesch Fasnacht mache!»

Bisch e Kind, mechtsch Fasnacht mache,  
denn git's kaini halbe Sache!  
So schrib denn unseri Obfrau aa und  
mäld Di gschwind zem Yyschtoo aa.

Yyneluege: Samschtig 02.03.2024 11.00–13.00 Uhr  
im Cliquekäller an dr Malzgasse 9 in Basel

Mir fraie uns uf Di!

Fir Informatione mäldsch Di bi dr Obfrau:

Céline Ryffel, Verschnuuffer Gnepf, Malzgasse 9,  
4052 Basel, E-Mail: [gnepf@verschnuuffer.ch](mailto:gnepf@verschnuuffer.ch)